

1235

范  
太  
史  
集

九



詳校官庶吉士臣何道沖

檢討臣何思鈞覆勘

總校官進士臣楊懋行

校對官中書臣嵇承志

謄錄監生臣李維瀛

欽定四庫全書

范太史集卷二十四

宋 范祖禹 撰

奏議

乞節講禮記劄子

元祐七年九月十二日  
講官同入

臣等奉聖旨講禮記伏緣禮記漢儒所集非聖人全經當有去取欲乞除喪禮十三篇不講外如篇中有不須講者亦節講取進上

聖旨依奏

再薦章元弼劄子

十月十六日

臣於去年十月具劄子奏舉新授知潤州錄事參軍章元弼乞除太學正錄或諸州教授未蒙施行臣伏見元弼履行清修文章華贍可充館閣之選自元豐五年銓試第一得循一資初任未赴以母病乞侍養歲滿調官未赴又丁母憂兩舉賢良方正以丁憂疾病不克赴試實緣留滯未有考第即與初及第未出官人不同臣竊聞林自除太學錄田述古鄭州教授皆無歷任伏望聖慈特賜比附林自等例除元弼太學正錄一官長育其

才勸率學者以增王國多士之美取進止

乞除賊盜重法狀

二十七日

右臣於去年十二月轉對奏事乞除賊盜重法未蒙施行臣聞王者之德如天無不覆地無不載四海之內皆赤子也無有遠邇當視之如一今重法之地獨為匪民一人犯罪連及妻孥沒其家產便同反逆先王制刑必使民得以自新不聞別異州域偏行峻令恐非聖世所宜為也陛下將郊見天地御樓肆赦若於赦文悉除此

法一切蕩滌與之更始足以感格人心名致和氣則帝  
舜好生之德大禹泣辜之仁成湯解綱之恩復見於今  
矣恭惟祖宗無不哀矜庶獄刑罰從寬遠過前代實有  
陰德上當天心是以承平百年福祚無窮唯自嘉祐七  
年初立窩藏重法至熙寧中中書檢正官奏請遂為著  
令皆因有司建議非仁宗神宗本意此乃權時之制不  
可久行臣前奏論之已詳今因初郊宜以為仁政之始  
聖人順動雲行雨施刑清民服此其時也伏望聖慈斷

而不疑特降睿旨於將來赦書行下使百姓曉然知二  
聖天地涵養無私之德不獨視此諸郡如夷貊之人臣  
將見民之戴恩淪於骨髓則勝殘去殺庶可望矣謹錄

奏聞

貼黃議者必謂一除此法賊盜必熾臣竊以為不然自嘉祐以來行重法至今不聞地分賊盜衰少近元祐編勅比舊法稍輕亦不聞賊盜滋多以此知賊盜多少不繫重法決可除去無疑并乞檢會

臣前奏施行

薦鮮于之武劄子 二十八日

臣伏見左朝請郎前監東作坊鮮于之武博學能文慎  
靜有守可備臺閣任使滯於筦庫衆論惜之其人年四  
十以上伏望聖慈特賜差充諸宮教授或內外學官一  
次漸加試用必有可觀取進止

薦張康國劄子

臣伏見左宣德郎張康國敏而好學文雅有餘自登科

第兩蒙堂除學職今授知鄭州新鄭縣事以父守官東  
南別無兼侍雖得近邑又已見闕而於私不便恐不能  
赴官臣竊惟朝廷方長育人才如康國者所宜收采伏  
望聖慈特賜差充內外學官一任取進止

薦王周道劄子

二十九日

臣伏見翰林醫學王周道博通方術用藥精審伏望朝  
廷特賜差充太醫局丞一次俾領教導必有補於醫事  
取進止

進郊祀慶成詩狀 詩附

右臣伏覩今月十四日南郊大禮慶成文學之臣歌頌  
盛德臣不揆荒斐輒作古詩一章并序謹繕寫隨狀上  
進雖不足以形容天地之美亦臣子各言爾志之義也  
于冒宸嚴臣無任惶懼激切屏營之至

郊祀慶成詩

并序

臣伏覩皇帝陛下以冬日至郊見天地臣幸得待罪從  
官在侍祠之列進俎授嘏攝官承事恭陪大禮迄於慶

成日覩嘉應昔所未有歡忭踴躍倍萬於常今茲羣公  
卿士皆作詩頌鼓舞盛德而臣執經帷幄其職在以先  
王訓典敷陳勸戒以補萬一其敢無辭昔周之成王郊  
祀天地其詩曰昊天有成命二后受之成王不敢康夙  
夜基命宥密於緝熙單厥心肆其靖之此告神之詩不  
敢忘戒也羣臣進戒成王其詩曰敬之敬之天惟顯思  
命不易哉母曰高高在上陟降厥士日監在茲此頌君  
之詩亦不敢忘戒也君不忘戒以告於神臣不忘戒以

告於君此所以能永保天命也恭惟祖宗光有天下三十餘年陛下纂承聖統恭勤典學實賴文母保佑扶持於今八年海內晏寧再祀明堂肇禋南郊神祇顧饗受祉萬億此乃持盈守成之初居安慮危之際也臣是以敢緣周頌之義作為四言詩一章凡百四十句直叙事實不為侈詞具述陛下祇事天地嚴奉宗廟精一之意傳示中外顯揚盛美因以勸戒其詩曰

皇帝嗣位照臨四極恭已八年日慎一日惟我文母振

古光越登茲太平誕保元辟再饗合宮無文咸秩未見  
于郊帝心若惕詢謀卿士作龜告吉祇率舊章無敢有  
易乃動大輶龍旂散戟國容煌煌軍容赫赫謁欵真宮  
明薦蠲潔乃入太廟用事八室神門降乘齋殿祇栗曾  
孫孝思風雲慘戚省性之夕陰翳霏雪日入而霽乾坤  
開闢列聖在天精誠合莫升自阼階如見容色樂作九  
變祖考咸格厥明禮成復步而出齊於惟宮百禮既飭  
輦及內饋郤蓋而入乃命百官勿迴班列一意尊神庶

幾有擇圓壇中天徹茵登級二儀並位太祖東席蒼璧  
黃琮陶匏橐桔升煙颶空休氣四塞六合清晏冬回溫  
律上神來下飈駕欵忽柔祇顧饗萬靈咸集登歌再成  
太史祝冊凡此犧牲天民之力凡比粢盛天民之牆天  
寶子民來歆子食帝厚其子其有弗答福祿穰穰既委  
既積乃整法駕迴御丹闕大賚萬方恩施艸木釋除逋  
負瑕垢蕩滌日月所照莫不被澤東夷南蠻西戎北貊  
服我聲教來覲來覲皇帝至仁惟天是則昆蟲不傷況

乃含識黃髮之叟歡呼阡陌曰似仁祖堯舜之質皇帝  
大孝溫恭朝夕師法文母至公惟一子子孫孫永奉成  
式天錫皇帝壽考萬億皇帝體道垂拱淵默不言而化  
萬物自得皇帝秉心清明正直訓於有位無敢頗僻天  
錫皇帝多士孔碩皇帝聖學若稽古昔商宗寅畏周文  
翼翼曰予一人實懼弗克天人之際不違咫尺母曰在  
上視予勤息母曰蓋高聽予于側天命不常惟敬勿失  
祖宗囏難惟慎毋忽危生於安禍兆於福如執大器傾